

50 egn de Mèscres en video

L Grop de la Mèscres de Dèlba e Penia à prejentà n dvd che testimonia l'atività portèda inant te mez secol



Stefén Dell'Antonio e Ezio Verra endèna la prejentazion del nef dvd.

Sociasions - "L ciapel a voetres, l vadagn a noetres!" Con chesta paroles l Laché saluta l publich dò na mascherèda. Instouta, aboncont, te la veia scoles de Penia, l salut l'è stat desferent. Dò 50 de atività, en sabeda ai 2 de firé l Grop de la Mèscres de Dèlba e Penia fà festèj sìe cincanteisem cedeàn toron. Per ches gran zil arjont, l'è stat enjignà n bel dvd che conta la storia de ches grop, olache vegn ence recordà l pensier del Laché.

La sera è stata avèta da la paroles de Ezio Verra, president del Grop da oramai sacotenc de egn. Con paroles scempies, l'a reingrazià la jent ruèda a la prejentazion e l'a spiegà en curt l lurier che l'è stat enjignà. "L me sà dalbon n bel projet, ches. Se pel veder ti egn coche l'è mudà nosc Grop, ma ence coche la tecnologia la é jita inant". Defat, l dvd met adum n muie de toc e de picoi filmac a partir dal 1969. Per beleche ogne an, vegn prejentà la mascherèdes e la neves de chel an e vegn sottrissà l'emportanza che à abù te svilup de ches grop Simon Soraperra de Giulio e Fabio Dantone de la Menina, a chi che a la fin, ge è stat fat n gran batiman a recort de sie gran empegn.

Dapodò l'a ciapà la parola Stefén Dell'Antonio del Monech, che l'a contà coche l'è stat fat l dvd. "Te ches lurier, no aon volù parlièr di Lachees, di Bufons e di Marascons: Carnascòr no l'è demò ches. Carnascòr l'è ence la mascherèdes, i atores e i sonadores, chi che enjigna i guanc e la scenografies, chi che scrif jù i tesé e chi che disc ite. No demò mèscres e faceres, donca, ma ence jent che ge stès dò a dut... e ence jent che va a veder, ajache zenza ches jent no podessa esser Carnascòr. Aon dezidù de ve portèr dant ches

dvd - à dit amò Stefén del Monech - ajache jai 10 egn aane enjignà n liber: istouta aon mudà, ma ches dvd l'a su la soracuerta i medemì colores e la medema fotografia de chela publicazion, ajache aon volù ge dèr mingol n seghit a chel lurier. Con ches produzion aon volù ence creèr n strument per slarièr fora noscia tradizions. Ches video l podessa vegnir durà te la ostaries, ti hotie e ti musees, ajache l'è stat fat tant per talian che per fascian." Per finir, l'a sottrissà coche l'è emportant te chisc ambic i cambiament de la generazions: beleche semper chi che dant se cruzia de meter a jir la mèscres, fajan l Laché, l Marascon o l Bufon, a la fin i rua a spilenèr sun paladina.

Dò aer vedù l dvd te la verscion per fascian, l'è stat endrezà n picol moment de comunanza, olache se à podù beiver e magnèr, se fèr doi ciacoles coi etres e se scutèr la notes de Forghin de Martin.

Nicoletta Riz



La soracuerta se lea a chela del liber fat per i 40^e cedeàn.